



Aningaasaqarnermut Naalakkersuisoq

Ulloq: 19-11-2021
J.nr.: 01.31.06/21-00960

Aningaasaqarnermut Akileraartarnermullu sisamangornermi ulloq 18. november 2021-imi aalajangiineranik Naalakkersuisunut ilisimatitsineq

Neriniartarfeqarnermik inuussutissarsiutilinnut, timersortarfinnut, katersortarfinnut il.il. ikiorsiissutit nutaat. Ataatsimiititaliap suliaa nr. 01.31.06/21-00960.

”Naalakkersuisut **inassutigaa**t,

- “Aningaasaliissutinit 20-imeersunit” ikiorsiissutinik pilersitsisoqassasoq, suliffeqarfinnut katersuussinnaanerit killilersorneqarnerinik eqqugaasunut, piffissami killilersuissutaasut atuuffigisaanni, malittarisassat tamatumunnga atuuttut iluanni.
- Inuussutissarsiornermut Niuernermullu Naalakkersuisoq piginnaatinneqassasoq aningaasaliissutit 20-imeersut ilanni oqaasertaanik aqqissuussinikkut iluarsissuteqartarsinnaanermik.”

Aningaasaqarnermut Ataatsimiititaliap oqaaseqaatai

Killilersuutit atuuttut pissutigalugit Nuummi inuussutissarsiortut imaannaanngitsumik inissisimanerat eqqarsaatigalugu ilassutit aningaasaliissuteqarnissamik qinnuteqaat una Aningaasaqarnermut Ataatsimiititaliamit tuaviortumik suliarineqarpoq. Aningaasaqarnermulli Ataatsimiititaliaq arlalinnik apeqquteqarlunilu oqaaseqaatissaqarpoq allakkatigut sapinggisamik piaarnerpaamik akissuteqartikkusutaminik. Taamatuttaaq Nuummi killilersuinerit pillugit Namminersorlutik Oqartussat nalunaarutaat sivitsorneqassappat imaluunniit nalunaarummik nutaamik atuutilertoqassagaluarpas ikiorsiissutinut tunngatillugu malittarisassat Naalakkersuisunit iluarsineqarnissaat ataatsimiititaliamit inassutigineqassaaq.

1. Malittarisassani 1E naapertorlugu ikiorsiissutit tapiissutinut aamma ajornartoornermi taarsigassarsiat 1 million koruuninut killilerneqarmata ataatsimiititaliamit maluginiarneqarpoq. Ataatsimiititaliamilli maluginiarneqarpoq killilersuutit atuunnerini neriniartarfiit arlallit annertunerungaartumik annaasaqarnissaq eqqartormassuk. 1 million koruuninut killiliinissatik Naalakkersuisut sooq toqqarpaat?
 - 1.1. Tapiissuteqarnermik aqqissuussineq Naalakkersuisut naleqqussarniarpaat? Akissut tunngavilersoqquneqarpoq.
2. Malittarisassani 1H-1J naapertorlugit suliffeqarfinnut ingerlatseqatigiiffissuuartut ataatsimoortunut ikiorsiissutit killilersorneqartut ataatsimiititaliamit maluginiarneqarpoq. Tamanna taakkununga pitsaanngitsumik kinguneqarsinnaasoq ataatsimiititaliamit oqaatigineqassaaq, tassami suliffeqarfiit taakku assigiimmik sakkortussusilimmik eqqugaammata. Tamanna naleqqussarneqartariaqartoq ataatsimiititaliaq isumaqarpoq.

Taama isumaqarnek Naalakkersuisunit isumaqatigineqarpa? Akissut tunngavilersoqquneqarpoq.

- 2.1. Tapiissuteqarnermik aqqissuussineq Naalakkersuisut naleqqussarniarpaat? Akissut tunngavilersoqquneqarpoq.
3. Malittarisassani 2B naapertorlugu kulturikkut ingerlatsiviit, soorlu Katuaq, piginnittuunermut tunngasut pissutigalugit tapiiffigineqarsinnaanngitsut ataatsimiititaliamit oqaatigineqassaaq. Tamanna ataatsimiititaliamit uggorineqarpoq. Tamanna Naalakkersuisunit isumaqatigineqarpa? Akissut tunngavilersoqquneqarpoq.
 - 3.1. Tapiissuteqarnermik aqqissuussineq Naalakkersuisut naleqqussarniarpaat? Akissut tunngavilersoqquneqarpoq.
4. Malittarisassani 3D naapertorlugu suliffeqarfiit aningaasartuutimik aalajangersimasut annerpaamik 80 %-ii matussusertissinnaagaat ataatsimiititaliamit paasineqarpoq. Tamatuma 100 %-iunissaa ataatsimiititaliamit kissaatiginartinneqaraluarpoq. Taama killiliinissaq Naalakkersuisut sooq toqqarpaat?
 - 4.1. Killiliinerup tamatuma 100 %-inngorlugu allangortinneqarnissaanut Naalakkersuisut piareersimappat? Akissut tunngavilersoqquneqarpoq.
5. 2020-mut aamma 2019-imut sanilliullugu suliffeqarfiit eqqorneqartut tapiiffigineqarnissamut periutsit marluk atorlugit qinnuteqarsinnaammata ataatsimiititaliamit oqaatigineqassaaq, tassalu aningaasartuutitut aalajangersimasunut taartisineq kiisalu kaaviartitat appariarnerannut taartisineq. Atorunnaarsitsinermut taamaatitsisariaqarnermullu, taamaalillunilu isertitassaagaluarnik annaasaqarnermut, taartisisinnaanerup ilanngunneqarnissaa ataatsimiititaliamit amigaatigineqarpoq. Taama isumaqarnek Naalakkersuisunit isumaqatigineqarpa? Akissut tunngavilersoqquneqarpoq.
 - 5.1. Tapiissuteqarnermik aqqissuussineq Naalakkersuisut naleqqussarniarpaat? Akissut tunngavilersoqquneqarpoq.
6. Eqqumiitsuliortut nipilersortartullu ikiorneqarnissamut periarfissaqarnissaat ataatsimiititaliamit aamma soqutigineqarpoq, taakkumi killilersuutinit aamma eqqorneqarmata. Ikiorssiissutit uku inunnut taakkununnga qanoq iluaqutaassussatut Naalakkersuisunit isumaqarfigineqarpa?
 - 6.1. Ikiorssiissutit suliniutit allat aqqutigalugit inuit taakku ikiorserneqarsinnaasut Naalakkersuisut naliliippat?
7. Ukiup naatsorsuusiorfiusup naareernerani suliffeqarfiit kingumoortumik tapiiffigineqarnissamik qinnuteqarsinnaassappat?
8. Upernavimmi tunillaassuunneq ataatsimiititaliamit assut isumakuluutigineqarpoq. Piffimmi inuussutissarsiorneq, tassungalu ilanngullugu aalisarnerup, ikiorssiissuteqarfigineqarnissaanik Naalakkersuisut pilersaaruteqarpat?

Aningaasaqarnermut Ataatsimiititaliap aalajangiinera

Siuliani allassimasutut oqaaseqaateqarluni apeqquteqarlunilu Naalakkersuisut inassuteqaataat Aningaasaqarnermut Ataatsimiititaliamit **akuerineqarput**.

Ataatsimiititaliaq sinnerlugu

2/3



Jens Napaattoq
Ataatsimiititaliap siulittaasua